

DEDICADAS
A S. M. EL REY
DON ALFONSO XII,

Perdona, ¡oh Rey! si 'l corazon gozósu
enquillotra d' afechu la mollera;
al mirate reblinca fachendosu
sin dexame 'scurrir como quixera:
pero tú amorosin y bondadósu
(q' así la fama lo corrió parlera,
sabrás que si la cencia non barrunto
ente los fieles de mió Rey me cunto.

En isti xardinin, del astur suelu,
q' á Suiza saca 'l rostru los colores,
siendo muy rapacin, ¡con cuantu anhelu
la montera llenáronte de flores!
Otra vez y otre mil se fuelgue 'l cielu
que 'n Uviéo t' afayes, pos les hores
déxennos al colar tal alegría,
q' un soplu ye na mas, señor, el día.

Aquí la fonte, que selin mermura
cuando 'l vientu solmena la enramada;
el rociú que baxa de l' altura
y que troca 'n diamantes l' alborada;
los raitanes cantando en 'a espesura,
la azucena, de plata espolvoriada...
cuanto medra y resquiciu tien de vida
en so llengua te da la bien venida.

¿Non oyes, lloñe... dolciquin sonidu
q' envidia la calandria fachendosa,
y el *iañu* mil veces repetidu
que llancia 'l alma cuando 'stá gozosa?
¿Oyes de les xiraldes el tronidu
y entamáse la danza bulliciosa?
Pos atendi, Señor, que fiel el vientu
"Viva ALFONSO," repite 'n claru acentu.

Los vieyos pe los años aparraós
lleguen á la ciodá, de vete ansiosos;
los mozos en sos fuerces enfotaós
fartos de reblincar griten gozosos:
montes, valles, atayos, hoy cuayáos
d' aldeanos se ven, que presurosos
atrás dexen bardiales y caleyes,
pa mirar el *retueyu* de cien reyes.

La rapaza xentil, cuya hermosura
fái se pieslle la rosa acongoxada;
la q' envidia la nieve so blancura
y el llucru mas chuseu so mirada:
la que dexa 'l cantar por so dolzura
la mas suave xiblata empapiellada,
tamien, Señor, por conocéte ufana
fuxe con otre mil de la quintana.

¿Vieste da cuando 'l foscú remolinu
llevantando al xiblar tal polvareda,
que 'l home de mas cuayu pierde 'l tinu
y á triar non acierta la vereda?
Pos lo mesmo, per llocu 'l campesinu,
sin topar sebe que tornallu pueda,
lixeru 'l monte troca per el llanu
pa rendíi homenaxe al Soberanu.

¿Como non alloriáse de contentu
al ver ente nosotros, placenteru,
á aquel que siendo rey, pel campamentu
el palaciu trocó, cual bon guerreru?
Quien fuelgu, corazon, fégadu, alientu,
nel pechu afaya pa llimir 'l aceru,
el pendon de Castilla, vitoriosu,
sabrá facer si aporta mas gloriosu.

¡ Gracias, Señor! la sospirada calma
q' hoy nos dexa alendar, á tí debemos;
¡ ay! que farta de pena' estaba 'l alma
y olvidar tos esfuerzos non sabremos...!
de la vitoria al cabu, co la palma
quixo 'l cielu, Señor, que te miremos,
y al que la paz nos traxo de la guerra
¿ cómo non falagallu 'n esta tierra?

Hermanos yeren todos, ¡ oh rey miu!
los que 'l mundo miraba per plasmáu,
esfarrapáse al vése, con el briu
que solo tien el español soldau;
¡ Cuantes veces ¡ ¡ ay! cuantes, condoliu,
esmuciéndose 'l sol, atristayáu,
á la par que fuxía, llagrimosu,
dexó escrito 'n es nubes fachendosu:

”España de valientes foi viveru
des que Dios fexo 'l mundo, y hubo dia
q' enritar su leon sañudu y fieru
la solmenada Europa atarrecía;
tanta gloria axuntó, que 'l orbe 'nteru
encerralla en so senu non podia,
y por eso Colon sin sentir penes
foi en busca de nuevos almacenes.”

D' esta patria, Señor, que la fiereza
del moru guerriador dexó amansada;
d' esta España, que nunca so grandeza
por dalguna nacion foi sotripada;
de la tierra del Cid, que sin pereza
cuerre lista del toque á la llamada,
el Soberanu yes; fai que la HISTORIA
bendiga Rey Alfonso to memoria.

Non t' esmuelga, por Dios, s' isti paletu
sin migaya de cencia, al ensalzate,
lu barruntes mas toscu que discretu...
¿ el corazon nos basta p' adorate?
En él s' afaya ¡ oh Rey! amor, respetu,
y en 'a xente que pálmia 'l contemplate
to recuerdu i-os dexes tan llancáu
que 'n sos almes te lleven retratáu.

Si quiciáes un dia, de repósu
llegues á estar famientu, ven lixeru
á gociar d' isti suelu deliciosu
en que Dios de la calma fexo 'l ñeru;
Uviéo, com' agora, fachendosu,
por mirar otra vez al Rial viageru,
escurrirá les fiestes mas chusquines
pa facéte les hores piquiñines.

Adios, Señor, y por compañía 'l cielu
te desea isti súbditu ignoráu,
que llegues á miráte visagüelu
y la Historia te llame el ”Rey amau;”
que fuxa de to alma 'l desconsuelu
y de gloria fartucu y adoráu,
pienses dalguna vez en ésta xente
que te diz al dexate, reverente:

”Cuando 'l sol su risina mas melguera
úmbia 'l mundo al riscar el nuevu dia;
cuando 'l himnu al Señor, na carbayera
los paxarinos canten d' alegría:
al cimbliáse les flores na pradera
que 'l rocíu cuayó de pedrería,
non faltará un astur en 'a montaña
que diga, ”Viva ALFONSO,” Rey d' España.”

Teodoro Cuesta.